

南京文獻

第二十二號

民國三十七年十月

匪石圖

王孝燿：
 王孝燿：
 王孝燿：

里乘備識
 鄉飲膾談
 北窗瑣識
 游梁雜識

南京市
 文獻委員會
 通志館
 印行

001695

1298-08

王東培先生遺像



先嚴寄滙先生行述

王兆庄

先嚴淡泊寡欲。以詩文詞書畫自娛。溫乎如春。肅乎如秋。精神內蘊而不散。父執之。以難老期之。丁丑秋。東夷內犯。先祖慈年九十。先嚴亦六十一。倉卒避地。由當塗而和而巢而壽而固始羅山。經信陽以達漢口。艱辛備歷。不孝姊兆芹姊夫吳叔御。時或相失。而先嚴先慈。翼先祖慈以行。風雪兵火。曾不須臾離。未幾先祖慈以微疾逝。勞瘁之餘。重以哀毀。冠氣益棘。不喜厭居。徙重慶。再遷江津。乙酉二月。先慈棄養。人非金石。況已稀年。又生平篤倫常之誼。有不銷鑠者哉。居江津。時與二三老友聚首。既賦落日詩徵和。又取鄉先正楊柳門先生句。古來必無白頭賊。我輩各愛青雲軀。書聯寄陳匪石丈於渝州。凡有題詠。不越思親念亂二義。蓋心力瘁矣。寇降之翌月。與同居趙瑞芝光甫兄弟買舟返里。初寓護國庵。嗣移王府園趙君所。越兩月。不孝歸。見先嚴神明不衰。趙氏相待極周摯。方以愛日長而竊自慶也。孰意前秋以來。感寒暑輒病。飲食小不慎輒病。家無一橡庇。姊家室毀待葺。妹兆荷隨塔易价寓蘭州。不孝卒業中學後。以弟友銘早殤。矢長依膝下。肩養親之任。而奉職交通部。數日一歸省。及今思之。終天之恨。其曷有極。去秋八月。先嚴病劇。姊與姊夫欲朝夕奉事。迎至止馬營所居。不孝亦乞假歸侍。旋即體氣日懣。時或小病。從兄異凡知醫。不孝等私詢之。謂今冬宜加意。日長至。石叢素丈逝世。聞之忽忽如有所失。然猶強起往弔。趙君屢來迎。言修治三楹。俾挈不孝棲止。先嚴忻然。鼎鑪備作。一一摒擋。為遷居計。今年二月五日立春。命外孫吳元達繪瓦壺梅花。為題一絕曰。甫到曉鐘春已回。千門萬戶笑顏開。寒家也有迎新意。買得瓦壺插野梅。見者皆以為鵲有生意逢吉之徵。七日晨。拾敗紙作小梅枝。則精神似已不屬。日晡。復為侄孫益倭作一畫。晚八時許。如廁起。略傾側。不孝等接以登榻。問所苦。曰無之。惟神色漸異。十一時後。遂不能言。急延胡鵬吳御龍胡子憲諸醫師注射不效。八日黎明。金誦盤醫師至。謂腦溢血。抽血或可救。乃日加午。痰湧。延至下午二時五十分。竟棄不孝而長逝矣。嗚呼痛哉。

里乘備識

江寧王孝燁東培著

識廢置

江寧府學。殿宇駐兵。先聖先賢。神位皆毀。

改革以後。尚有告朔之餼。近年殘毀益甚。孔子以下列位。皆棄爲薪料。殿宇馬糞高積。禮樂諸器。更爲亂兵偷竊作玩具。從祀諸祠。自崇聖殿以次皆駐兵。

縣學夫子廟。易名曰孔子廟。先賢先儒位皆毀。

崇聖祠五代之神位。作地平鋪板。祠堂庭前。唱鼓書。作茶寮。大成殿配位。暨兩廡從祀位皆毀爲薪材。廡宇改作圖書館。至懸裸體女子畫。任人觀覽。大成殿亦常作骨董肆。環宮牆內外。雜列破舊諸肆。如園閣。

樞星門外。天下文樞坊。暨泮宮前坊。均拆卸。賣木作價。致坊建於同治庚午。僅一周甲。已。坊字爲里人端木堞書。開爲木匠某得去。衡府紀善周公祠。賢良祠。孝悌祠。上江兩縣儒學署。均易名各有用。祠內神位皆毀棄。

明德堂開小學校。堂後尊經閣。作賃舍。

貢院廢爲市廛

明遠樓迤北內宅。皆更爲他用。東西文場號舍。均賣民間築屋設肆。貢院諸碑記。嵌至公堂廊下皆存。特留左右數號舍。資遺念。

鍾山書院。改建學舍。

亂後移門帘橋。規置崇閣。旣廢。易爲江南高等學堂。其後又改爲江蘇省立第四師範學校。近又爲南京中學。

藏書二樓。皆書院之遺。屢亂尙無恙。廳事尙存左文襄正誼明道一額。文正書院。改建學舍。

奉新許文敏公振緯。承宣江寧時建。蓋表率師事曾文正公遺意。右八府塘。既改爲江寧府中學。旋改爲江蘇省立第一中學。

惜陰書院。改學舍。又爲圖書館。

前改爲上元江寧兩邑小學。端方督兩江。收沒仁和丁氏八千卷樓書籍。南陵徐氏書畫。築樓兩幢。仿文瀾閣。改爲圖書館。官後屢易主管。屢有更名。俗父偷兒。充塞狡猾。益視爲利藪矣。

尊經書院。卽以夫子廟後尊經閣爲址。科舉旣罷。遂更名曰校士館。每月一次師課。不久就廢。

鳳池書院。改爲小學校。

亂後置宅在新廊。

奎光書院亦廢

四仲書院。原任上元縣知縣王伯芳大令芝蘭。捐廉課士。每季以仲月試士。科舉旣罷。旋廢。

甘棠文塾。建舍於黃泥巷之西。前知上元縣事桐城甘紹盤。遺廉俸給孤寒。每月試一次。今廢。而塾舍賃織布工爲寄宿地。

築野文會。借楊氏宅。在朱狀元巷。爲丁家巷傅氏捐資。以試孤寒子弟。仿甘棠。每月試一次。詩賦詞章。傅氏家中落。遂廢。

文昌宮。於甲子年冬。被廣利慈善會不戒於火。正殿全燬。武廟改祀關岳。不久廢棄。以殿屋改爲銓敘官吏所。

上江考棚。安徽督學試士錄遺之所。改爲安徽公學。

中有明恕堂額。石埭陳文書。今在。考棚屢易地。今在中正街。

下江考棚。江蘇學政試士所。改爲織布廠。

在南門程子祠之右。又以餘屋改爲積穀義倉。

上元縣署。改爲貧兒院。

縣署在昇平橋。兵亂時。收拾各地難民遺棄之子女。擇地給養。乃以縣署作廣廈庇寒之所。布政使日盈庫大使署。資與民間。改作祠堂。

有貢紙舖王姓。募古人敦睦誼。買去作家祠。陳作霖爲撰祠記。在布政使署東。

江安督糧道署。江甯府署。都統署。北補通判署。均爲駐兵所。

督糧廳署。府檢校署。南捕通判署。均改爲學校。

江甯府署西箭道。及江防同知署。均拆毀。改學校。今鍾英學校。卽南捕廳署也。

駐防將軍署。辛亥兵亂拆毀之。

辛亥改革。凡駐防城大小衙署。及民屋公所。萬壽宮祠宇。一律拆毀無遺。

祭院續造署。初議改要人生祠。近爲市場貿易所。

南郊江甯縣丞署。改爲警察駐所。

總督署。布政使署。擬有改革。不勝瑣記。屋宇之改造。情狀之變遷。人事之迭更。至爲煩雜。

奉微亭。清涼山曠觀亭。欽天山燕子磯亭。昔題御碑。均毀。

燕子磯改爲小學校。曠觀亭連北極閣。近改建無線電臺。

鍾山茅真君廟。砂碛巷城隍廟行宮。門西五雲庵。或毀或改爲學校。

紫金山茅草凹茅隱君廟。爲兵毀。泥塑像以巨繩曳倒之。餘或棄偶像。而占其屋爲他用。

城內外橋上有屋者。凡九。如北門橋。西華門橋。內橋。南門內橋。外橋。新橋。大中橋。水西門外寬渡橋。自丁卯夏。一律拆除橋上肆屋。居民至遷徙無計。有覓死者。

橋屋既拆。橋欄未修。路又不平。行人過往。每戒懼。近且刑人於橋上。臨時絕交通。尤不便。鼓樓已塞往來闢路。四圍點綴亭臺花石。若園固然。但不久以兵燹故漸毀。樓上置警火鐘。

儀鳳門進西。關城門曰海陵門。神策門進西。關門曰豐潤門。命名之意。皆取阿諛長官也。近又改易新名矣。

踞明故宮內五龍橋大明門之上。設古物保存所。羅列城內金石書畫彝器種種。真偽揉雜。造屋兩幢以儲之。

駐防城內三忠祠。辛亥冬間被亂兵毀。今移血蹟石於古物保存所。

明時毀陸大石。有採自渤省新城昌化者。其石有紅斑。小者尤鮮明。可作印章。俗曰鷄血紅。今遺血蹟石。恐是此類。至謂方文忠公不肯草詔。敵齒血漬石上成影。恐附會耳。

舊王府闕。已巳年夏間。毀闕大道。

承恩寺東。舊王府留南面闕門。存古蹟也。此爲明祖自爲吳王時所築。其後定鼎。以地卑屢遭水故。遷東城。今削除無餘已。原闕門不高廣。左右掖皆有門。砌石平整。撲而不斷。旣毀而石亦不知何在。

東城大樹城牆拆通近十丈。成一闕。

填平城內外民家墓地無數。杜撰城門名曰武襄。轉瞬城中設防備。又以沙石盛包壘堵之。旱西門北隅城牆拆通七八丈。成一闕。

內闕成路。東達新街口。城闕外多民居廬舍。欲闢路。非徙民不可。

自海陵門迤南行。或曲或直。或東或南。數十里闢成大道。直達朝陽門外。所過毀民屋數千家。

又自神策門。直南行。至於聚寶門。南北相距十餘里。亦闢成大道。南路工程。至於內橋暫止。北路工程。迄未措置。就中毀民家亦無數。

花牌樓街。南北相距五六里。就原路擴充平坦之。

昇平橋至於珠寶廊。亦成廣途。

預計城內闢路四達。有所謂幹路。或支路。舉國細囑。如畫網線。今才程工伊始。後顧茫茫。殆不知將來已。

新街口周匝成環轉路。成大空場。毀民居不計數。

隴僧居奇。一時竟將地值輟斷之。每方可數百金。每畝可數千金。未及二三年。已冷落車馬稀。就中受累者。至覓死不可得。

曾文正祠 在龍蟠里。廢爲學舍。

馬端愍祠 在龍蟠里。改爲民舍。

左文襄祠 在蓋山麓收兵橋。其裔拆毀之。

沈文肅祠 在龍蟠里。改爲學生寄宿舍。

曾忠襄祠 在盧妃巷西。裔孫賣屋爲民舍。以享堂賃作工廠。

上元節孝祠 在烏龍潭前。賃爲織布工所。

萬壽宮 在中正街。改爲演講廳。復又駐兵。

北極閣 在欽天山。改建無線電台。

文津橋 在江寧府學西隅。乙亥二月間。毀爲路。改築磚砌橋梁。

卞忠貞祠 在府學西。乙亥二月毀墓門。以其地爲駐兵屋。

聚寶門 東西闢二門。曰中華東門。中華西門。而易中門曰中華門。以東爲出。以西爲入。車馬由之。

人行可由中門出入。

識人

江寧近有五布衣。工詩書畫。論者稱之。

陳忠倚。字奎圃。工李邕書法。能詩。收藏金石極富。游幕半生。足跡所至。人皆倒屣迎之。平揖公卿門。禮貌稍衰。拂衣去。不顧也。年六十餘卒。子虎文。亦能書。

施瑞年。字葆生。工畫。書法香光。與揚州吳讓翁稱莫逆交。詩亦可誦。題畫諸作。尤淡雅。晚居莫愁湖。日夕對佳山水。揮毫動興。皆入妙境。畫山水。法梅鬯山。畫水石花鳥。如錢搢石華秋岳。著有仁讓堂集。

徐承恩。字沛濟。工書法。古人墨蹟法書碑版。過目如獲異寶。積三十年。遂深造。嘗臨趙子昂書道德經小楷付石刻。名流題識極多。又善作晉唐人書。皆入妙。久客長沙。子孫或寄籍焉。

孫正昶。字雲伯。工吟詠。詩詞皆不妄作。有獨到處。晚居鳳游寺。築水南草堂。抱膝坐嘯。手一編若老儒。而無頭巾氣。卒年七十餘。子潛源。吾益友。績學勗品。爲刊水南詞一卷。

程均。一名先進。字彬士。別字默默道人。善畫山水。二十年中無一日懈。所畫大小近千紙。各極其妙。嘗徧畫二丈長卷。花鳥百果。或撫仿古人。至廢寢忘食。山水尤精詣。所臨不一家。所畫兼衆長。題詩小識。尤軼時史。藏度極富。類多精品。余近記千一齋讀畫。可嘆觀止。晚嬰疾卒。年五十餘。

漚史氏曰。五布衣者。余皆與同時。獨常見雲伯先生而已。昔者不知程彬士。所作尤僅見。思作四布衣

傳。告吾友金想靈。以其深悉沛齋也。茲乃獲五人而類聚之。爲之合傳。

胡少懷。江寧人。居復成橋西。毀肆奉其父。以孝稱。癸丑之夏。城中亂亟。八月朔。少懷父爲亂兵所執。將殺之。少懷籲以身代。亂兵捨其父。遂殺少懷。事平。管事者訪悉。爲表墓。余爲作胡孝子傳。

吾鄉當咸同時。有三御史。直聲徧京國。一上元方俊。字伯雄。揭參兩江總督陸建瀛。死有餘辜。請治罪以謝江南。朝議撤銷身後卹典。僅還總督。中外士論。皆同稱是。一爲上元朱鎮。兩廣總督朱桂楨之子。特參會文正湘軍復南京。擄掠子女玉帛。挂帆歸湘。其情無殊寇來時。曾某功高而謗隨之。尙不自知。責備賢者。極有毅力。疏上。遭斥撤回原衙門。一時京朝。頗服其敢言。一江寧潘敦儼。字清畏。雲貴總督潘鐸子。以穆廟崩後。皇后絕粒殉節。慈禧太后垂簾聽政。特參太后不爲皇后殉節褒崇。比之民間節婦尙不如。何以示天下。又何以慰天上。語極質直。於光緒元年朔旦朝賀。出班上奏。即遭嚴譴。恭親王救免。出都門。祖道塞途。京內外服其果敢。

黃慎之殿撰。亦字瓢生。道光壬寅正月初五日寅時生。爲四壬寅。八字甚奇。其遠祖黃道行。由休寧始遷江寧。三世祖瑞。字輯五。有宅在倉巷。官震澤訓導。著四書會要。高會上下皆諸生。父汝玉。字諫帷。邑諸生。咸豐癸丑。率家人三十八口。闔門殉難。殿撰才十二歲。亦侍死。卒爲臧獲輩救出。乃免。元配妻金氏。爲偉軍先生贅孫女。相傳殿撰避難吳下。即寄居金宅。因入贅焉。

張仙槎先生實。世居油市大街。或曰三山街。諸生。工詩畫。喜遊名山大川。凡所過境。皆自作圖題詩。名曰泛槎圖。計六續六冊。當時遍徵名公巨卿。海內文學。題詠詩詞。每冊皆數十人。先生既自繪圖。又自鈎摹各題詠畢蹟。然後付梓。先生出游時。年已四十四。家有子。七十餘。猶自峨帽歸。夫婦齊眉。子孫繞膝。誠昇平樂事。先生爲溫明叔宮保內叔。今張紹棠種芙昆季。皆其裔。

承恩寺有僧曰行舉。能詩。其師龔乘亦能詩。見隨園詩話卷十。鄭芝崖觀察嵩齡。上元人。寄居儀徵。咸豐戊午舉人。同治戊辰進士。仕至浙江糧儲道。父彤書。道光己亥舉人。官嘉興通判。祖兆杞。嘉陵甲戌進士。官吏部員外郎。曾祖宗彝。乾隆戊子舉人。壬辰進士。官浙江道監察御史。弟喬齡。庚午舉人。官海州學正。科甲世家。不知何時寄居邗上。城中三坊巷之鄉。系出溧水。非一派也。

江甘棠。旌德人。寄籍上元。由咸豐間舉人。出知江西南昌縣事。光緒甲午乙未間。南昌教案起。召棠竟被神父王安之殺死於縣署。一時驚傳其事。幾釀巨禍。事平。具獄。王安之等皆論罪伏誅。召棠賜卹被旌。御史趙啓霖誄之曰。重於泰山。輕於鴻毛。男兒死耳。人爲刀俎。我爲魚肉。天下痛之。張井。字鐵耕。居破布營。刻印法坵道人。甘氏津逮家藏印章。多出其手。見白下瑣言。

戴並功並德。其先婺源人。居北門橋。書法學包慎伯。而微有俗氣。刻印法鄧完白。幾能亂真。

常照村。名炳元。江寧駐防。道光丁酉舉人。官襄陽府同知。家居糖坊橋。善畫。工詩。尤精畫梅。自其先世。已與漢人通婚姻。三子皆通籍。長承蔭。庚辰進士。戶部員外郎。次承恩。戊子舉人。理藩院主事。三承厚。壬辰進士。江西知縣。

國初王之輔。原籍浙江秀水。流寓金陵三世。遂爲上元人。同治志不爲列傳。但於古今人類略紀之。姚惜抱府志。亦不詳載。第紀之輔長子善於技藝類。是前志之漏。陳伯雨文金陵通傳詳紀之。圖繪寶鑑。張瓜田畫徵錄。王漁洋鷺尾集。皆有傳。王氏父子。文采風流。有足紀已。

王之輔。字左軍。父允臧。官麻城知縣。自秀水遷金陵。居莫愁湖側。明亡。避跡不出。自號曰牢。曰囚。顏其居曰蠶庵。

名長子曰句。字東郭。次子曰尸。字弟爲。三子曰犢。顧名而恩義。寓責備成人之愆。桐城方爾止文。以女妻句。爲請於之輔。存名言而易字義。於是易句爲槩。字安節。尸爲著。字苾草。犢爲臬。字汝諫。

安節篤行耆古。工詩文繪事篆刻。著有山飛泉立草堂集。高座寺志。三段碑考。

宏草。又號湖邨。善隸書。工詩畫。張南邨愬之女壻。著有瞰浙樓集。

汝諫。又字司直。善金石刻。工畫。王氏家人。自之輔皆茹素奉佛。安節子將東大田均能詩。

濮仲謙。古貌古心。粥粥若無能。然其技藝之巧奪天工焉。其竹器一帚。一刷。竹寸耳。勾勒數刀。價以兩計。然其所以自喜者。又必用竹之盤根錯節。以不事刀斧爲奇。經其手。略刮磨之。而可得重價。名噪甚。三山街潤澤於仲謙之手者數十人焉。而仲謙未貧。偶見佳竹屏。輒自爲之意。勢利啖之。終不可得。見山陰張岱撰陶庵夢憶。

鄧邦康。字小婷。知府鄧嘉純之女。編修鄧邦述之妹。歸江浦陳氏。篤學多文。手輯林文忠鄧倡和集若干卷。又著鄧懈雲先生年譜。爲文極敏速。歐西人亦知名。壻亦有才智。卒年四十八。江甯劉係元茂才爲作墓誌。

侯烈婦。姓嚴氏。上元廩膳生侯際昌女也。際昌病歿。匱在堂。烈婦旦夕痛哭。一日。隣不戒於火。焚將及。烈婦登樓大號曰。速爲救匱。門內人聲如沸。奔亂雜踏。若未遑者。無何火至。烈婦知不免。痛號自樓躍於火以殉。其時際昌之匱。已爲救趨於外。而烈婦不知也。論者謂殺身成仁。烈婦有焉。

楊貞女。溧水原籍。居江甯。兄某。諸生。貞女通詩書。居室課女弟子讀。有淑譽。光緒壬寅二月間。字上元王昌元子偉爲婦。嫁有日。昌元子染疾暴卒。匿弗與貞女知。而潛請楊氏。別爲之議昏事。貞女久而後知。絕粒求死。又自樓下墜求身殉。均被援。自是咄咄書空。伴髮毀容。若有所見。遂病歿。王氏嘉其貞。求合葬以成其志。

滙史氏曰。王與余爲比隣。余又知貞女兄事。聞羣議表彰之竟不果。余懼其湮也。爲之傳。以告惇史。

鄭烈婦。李氏。上元人。父祚熙。邑諸生。歸江寧甲午進士浙江知縣鄭維翰之子縣學生師擢。素通文翰。姿容端莊。性尤淑婉。師擢試不獲志。病。烈婦禱祈醫藥備至。已而籲天剝臂肉爲藥以進。勿藥。烈婦仰藥殉。距師擢之歿。僅二時。兩梓並歿。陶巽人孝廉爲狀。旌旌揚焉。

秦淮徐校書。當金陵城陷。殉烈自誓。先題其襟曰。辱體養親非素願。致命遂志乘此時。九泉若共楊郎見。不負當年一段癡。見可憐集。春草吟廬隨筆。

胡孝女。江寧濱江鄉人也。一日。父某自田間歸。閉戶就息。有盜來。父出禦之。孝女救父。恐弗敵。卒嬰盜亂刃以死。孝女年才十四。鄉人爲作孝女傳。余於讀傳書後一篇。長州章鉅爲作傳。

陳節母。上元石氏。年十五歸陳蘭癡爲簋室。蘭癡病。割臂和藥以進。旣卒。守節撫孤兒。才八歲。石時年二十四。內奉姑嫡。外持家政。又十餘年。爲孤兒授室。甫抱孫兒。又病殍。節母又撫孤孫。至于成立。艱苦淒楚。六十年如一日。旌表如例。江寧周樹昌爲撰節母傳。

節母爲吾友陳蘭孫詒慶之庶祖母。蘭孫曾祖劍芝先生維屏官山右。自是祖若父皆流寓。光緒乙未。節母攜蘭孫歸里。宣統庚戌。節母卒。蘭孫勾周子穆先生作傳。徵文表操焉。

節婦王氏。王永林之女。所稱曰觀音門王善人是也。適太平門外馮氏。夫國俊。嬰疾。王氏誓天。願以身代。聞古來多割股和藥。可起病。即焚香告祖宗。剝肉一片以進。未幾。國俊不起。哀毀不欲生。勉強支持。撫孤子成人。茹荼終身。光緒三十二年卒。守節若干年。

貞女吳氏婦。神策門外人也。九歲嫁于陳家井吳氏。爲童養媳。年十四。遭粵寇亂離遷徙。吳氏子失所在。未歸。貞女守志。誓不嫁。長齋事佛。終其身。光緒十四年卒。北固鄉人皆敬之。曰吳貞女云。

節婦王啓發妻楊氏。有淑行。孀於楊。僅一年。啓發病卒。家酷貧。節婦檢柴山野間。蠶薄糜以爲活。或小有餘。給其隣里之窮者。否則獻香花供佛前。平生寡言笑。人不見其露齒時。歿於光緒丙申年。守

節若干時。

陳維垣妻。李氏隨宦入京師。維垣官內閣中書。病歿旅邸。子元恆。才八歲。扶襯撫孤。歸江寧。家本寒素。婦如閭閻待之薄。李氏教子益嚴。而佐以針黹。隣里間皆稱賢。無間言。元恆中同治丁卯舉人。孫作霖。光緒乙亥經魁。作儀。庚寅進士。人皆以爲母教之獲報。光緒某年。旌表節行。卒年六十九。

貞女賴氏。原籍浙江。父某。官山西長子縣典史。貞女字江寧陳元豫。未幾。元豫卒。貞女知之悲號欲殉。時父已歿。家惟寡母弱弟耳。鄰有勸再字人者。貞女揮之出。母知志不可奪。請媒氏送歸陳。親視含殮立主。以猶子作謀嗣。貞女誓天。以頭觸地。流血滿襟。守貞若干年。旌表貞孝。見禪靈寶文集。

烈婦席氏。上元候選從九品席元炳女。江寧舉人陳作霖次子邑諸生詒祿妻。詒祿疾卒。席氏痛不欲生。勺飲不入口。越七日。即仰藥以殉。年二十四。奏請旌表。

里人黃慎之思永學士代呈

明史一百十三卷。后妃列傳。載武宗后夏氏。上元人。正德元年。冊立爲皇后。嘉靖元年。上尊稱曰莊肅皇后。十四年正月崩。合葬康陵。謚曰孝靜莊惠安肅溫誠順天僖聖毅皇后。

世宗后方氏。江寧人。嘉靖十年。后與鄭氏王氏等。同冊爲九嬪。冠九翟冠。大采鞠衣。圭用次玉黻。文冊黃金塗。視皇后殺五分之一。至期。帝袞冕告太廟。御華蓋殿。受百官賀。於是張弓發。遂立爲后。二十一年。官婢楊金英等。謀弒逆。帝賴后救。得免。乃進后父泰和伯銳爵爲侯。二十六年十一月后崩。詔曰。皇后比救朕危。奉天濟難。其以元后禮葬。降慶祖。上尊諡曰。孝烈端順敏惠恭誠祇天衛聖皇后。

今城東草子巷東轉。有方家巷。亦名方家苑。卽孝烈家居此。大廈高樓。尙有遺宅可指識者。

節孝馬伍氏。邑諸生。馬士賢之祖母。年十八。歸馬壽民。一年。壽民卒。遺腹才兩月。及娩。生子癭生。撫孤成人。娶婦生子。癭生年二十餘。又夭折。伍協其婦哈。一如其昔年之茹辛守節三十四年。士賢旣補諸生。於光緒三十二年。翔節行上當道旌表。宣統二年。崇祀上元貞孝祠。

癭生妻哈氏。伍節母之子婦。馬士賢之母。癭生客荻港。歸途感疾卒。士賢兄弟才弱息。哈氏上承姑命。下撫遺孤。垂三十餘年。未及旌表。國吏。士賢自撰行述。備志乘之採。

識金石書畫

花林梁蕭儋碑

今用起重機扶直。里人仇垞楊鹿鳴董其役。溯此石斜立田間。自朱竹垞題跋已云然。數百年來得以保存。亦幸事也。仇垞爲作記。撰刊之碑旁。

燕磯永濟寺清高宗賜僧默詩刊石

高宗南巡幸寺。老僧默默百有一歲。清健如少年。因賜詩曰。不會詩文不解禪。果然默默以全天。半生塵世半生佛。亦號山僧亦號仙。命勅詩于石立寺壁。未幾忽奉旨改第四句爲可號山僧可號仙。於是將四字重刊于亦字上。今碑尙存。

報恩寺碑

今在南山門前。二碑完整。其一爲火燬。有裂痕。明永樂間立。

宋晟墓神道碑

今在天界寺北。二石屹立道旁。刊御製賜祭葬文。

朝天宮碑

今在江寧府學東首。二石缺一。

孝陵神道碑

今在陵前里許。四周有垣。俗曰四方城。

改鍾山爲神烈山刻石

今在朝陽門外石岡路旁。右有石坊踰大道。

徐中山王墓神道碑

今在鍾山陰。王墓前。

鄧武順寧河王墓神道碑

今在鄧墓山西首路旁。

俞通海墓神道碑

今在機器局前。卽雨花臺山後。

卞忠貞祠碑記

今在冶山西忠貞墓前祠屋內。同治九年庚午蒞澤馬新貽譚文。瑞安孫衣言書。

識事

焦若侯名竑。實取考工記輪人竑其輻廣以爲之弱之義。猶之陸放翁名游字務觀。取游爲旌旗之旒。務爲矛旖之屬。

黃九煙亦號黃夕陽。以夕陽詩得名。明社旣屋改名。人字略似。又號半非。笑蒼。生二子。一承周姓後。遺歸湘潭。康熙庚申已七十矣。自作墓志。五月五日泛舟西湖。縱飲大醉。賦解脫吟十二章。投水死。所著夏爲堂芻狗齋稿已佚。驚天泣鬼怡人集雖傳世亦鮮見。今存其夕陽詩暨墓銘。

我聞詩人言。夕陽無限意。夕陽自夕陽。何與詩人事。多少蚩蚩兒。昏覺同夢寐。獨有多情人。煙雲滿胸次。所見皆夕陽。夕陽况相值。初不與詩期。爾時詩自至。靈均鍾指黃。淵明賦佳氣。夕陽本無言。詩人自憔悴。多情我亦然。見此欲下淚。吁嗟一夕陽。宇宙終相始。碧雲惹相思。明霞淡搖曳。芳草恨無休。紅樹紛如醉。種種與情來。茫茫自端萃。羈客劇傷心。美人漫凝睇。第一最銷魂。無如雨後霧。黯黯近黃昏。明滅半蒼翠。悲吟織暮蟬。殘虹空點綴。銷魂復銷魂。尤在秋冬際。草木倏變衰。悄如天地閉。斷雁與寒鴉。點點皆愁思。終古此夕陽。閱盡人間世。河山送興亡。城郭古今異。松柏五陵煙。樓臺鎖薛荔。哀樂兩無端。歌哭都非是。所以鍾情人。詠歎恆不置。長篇或短篇。風謠及頌偈。詩但說夕陽。便有深妙義。或一兩句佳。定帶夕陽字。首尾縱參差。往往不忍棄。問我何爲然。殊不可思議。毋乃固癖成。韻事等魔祟。詩爲夕陽窮。亦爲夕陽貴。夕陽爲詩傳。或亦爲詩累。詩耶夕陽耶。是一還是二。若與我爲三。共命同根蒂。我今盡蒐羅。不獨充巾笥。愁以當醇醪。病以當藥餌。亦可驚天公。亦可泣幽魅。此集若告成。詩人應破涕。萬古復千秋。夕陽長不墮。

右夕陽詩

笑蒼乎笑蒼乎。爾既不屑生前之富貴。獨不留死後之文章乎。既不能飛身於碧落。獨不當演夢於黃梁乎。而今竟若此。是安得不心傷乎。然則爾之英風浩氣。甯不翻五岳而配三光乎。

右墓銘

先生又號間庵。沃沃主人。居皮場巷。卽今之平章巷。好食鑊底焦飯。人又稱之曰鍋巴老爹。長子名穉字禹弓。負才有志。杜茶村亟稱之。先生又與呂晚邨善。晚邨家書曾及之。

董敦堦赴雲貴總督任。舟車數閱月。正苦勞頓。已入滇境。山川平衍。樹木蒼翳。心有所悅。登陸散步